

Picca è lu tempu

Tanti facci cca davanti
stasira cunfusu vaiu taliannu,
ma sulu tu, armuzza me',
da pocu tempu 'un cci si cchiu'.

Tu sta' durmennu, ma jè ti lu dicu:
"Sbigghiatì, corì, semu tutti cca;
aspetta, amuri, ancora un minutu,
senti 'sta vuci chi t'av'a canta':

"Picca è lu tempu chi tu ha' vulatu,
granni è la pena chi tu ha' lassatu;
lu munnu camina, la vita currennu,
si 'uncianu l'occhi chi stannu chiancennu".

Li picciliiddi

Li picciliiddi su' gocci di stiddi
caruti 'nta lu mari
speranza di smeraldo du' futuru
'nta un munnu spissu a lu scuru.
Li picciliiddi su' stizzi di celu
caruti 'nta la terra,
lacrimi d'amuri di la matri
'nta lu partu,
nuttati 'nsonni a sucaricci lu ciatu
quannu 'na malatia, 'na frevi
cci abbrucia la frunti
o li fa chianciri scantati.
Li picciliiddi su' ancili senz'ali
e quannu ririnu t'allarganu lu cori
e ti portanu 'm paraddisu
acchiappannuti 'nta 'na riti d'oru.
Ma comu mi strazia lu pettu
si quarchi bestia marvaggia
allungannu la manu
comu ummira d'un muru lippusu
l'afferra in silenziu e li violenta.
Vulissi allura
'ngirlandaricci di favuli i capiddi
e carizzari li facciuzzi nichil
pi' livari lu scantu di 'nta l'occhi
e inchili di matinati lucenti
di tramunti cumenti.
Vulissi cantaricci l'alaò
chi mi ninniava me matri,
amurusa e tennira,
e annacalli cu' 'na naca
'ntessuta di nuvuli 'mpalpabili

pittata d'arcubalenu,
pi' falli addummisciri cueti
e sunnari ciuriddi arriccamati
'nta un tappitu virdi
a primavera
e farfalli in volu
'nta un celu finarmenti serenu.

Jè picciutteddu

Jè picciutteddu e ajeri mi pari
'ustu d'anticu cuminci'a pigghiari.
Un paru di cavusi arripizzati
du' scarpi a li peri mezzi sfardati.
E cursi 'nto suli acchiappannu la vita
cu' gioia vissuta, di picca condita.
Un pezzu di pani, 'na sarda salata
'na botta a lu bummulu 'nta staciunata.
Me' matri a la pila li robbi lavava
stinnennu a lu ventu chi l'asciucava,
supra curdini e furceddi a lu celu
sia cu' gran cavruru o puru a lu jelu.
Di menta e basilicu l'aria 'mmarsamata
me' matri cantava 'na canzuna 'ntunata,
me' soru annacava chi forti chiancia
e alaò e alaò e la nica durmìa.
La sarsa sicca a lu suli sparmava,
a li festi raù e bbonu si manciava.
Li ficu siccatti supra li cannari
'n terra li mennuli stisi a 'sciucari.
Lu gersuminu di 'na giarra sfunnata
di maggii arricriava ogni sirata
senza tv, a lpi friscu assittati,
unu cuntava e tanti ammucciati.
Li vuci, li sati, lu picca ch'abbastava,
ogni picciliddu filici jucava,
'nzeguìa li sonnura chi la notti facìa
vulava a li stiddi, senz'ali, e ridìa.

Quannu la sira

Quannu la sira s'innesta 'mprovvisa a lu jornu
cu' la chiarìa chi campa stintata fin'a vespíru,
e ventu gelidu di tramuntana
s'infila 'nta li picazzi di li casi
rusicati di la lebbra di lu tempu,
ancora a lu me' paisi
omini e petri osannanu santi
e bistimianu a tutti
e li picciotti cunzumanu la jurnata
cu' scarpi di rassegnazioni,
pittinannu l'uri 'nta li marciaperi
'm mezzu a lu vilenu di li machini.
E po' cala la notti cu' silenzi e fantasimi
'nta strati vacanti e solitarii
c'un cani attaccatu a lu canili
ch'abbaia, ogni tantu, a la luna,
e pari di sentirli lu ciatu di lu tempu,
vuci ovattati p'un disturbari
e all'improvvisu lu chiantu d'un picciliddu,
mentri jè parlu a lu ventu
e li minuti sgrananu lu rusariu di la vita
cu' lu sipariu chi cala finarmenti.

Riordi

La luna spuntava
r'un subbissu d'arvuli nivuru
a illuminari lu 'ncantu di lu celu
'ncastonatu di nuvuli di matriperna
supra un mari culuri d'azzaru
dunni l'acqua duci duci ciatava.

Lu silenziu si spannia vuluttuosu
e jalina la luci sfiorava l'unni
all'orizzonti.

Ancora tepida l'aria
illanguiria lu cori
alitannu riordi di gioventu'
rarifatti fulati di brezza marina
'nta 'dda notti d'estati.

San Ciuseppi

Tu l'accettasti cu' allegru visu
la to' spusidda di Gesu 'ncinta;
la ricivisti cu' gaiu sorrisu
senza timuri e anima 'mpinta.

Forsi lu dubbiu cci fu un mumentu,
ma lu to' amuri pi' la Madonna
paci ti detti senza turmentu
e la to' fidi fu forti culonna.

San Ciusippuzzu, patri amurusu,
fusti l'emblema di tolleranza
e lu figghiolu a Ddiu gloriusu
tu cci criscisti cu' bbona crianza

Ti lu godisti 'na pocu d'anni,
l'occhi l'avia comu lu celu;
a Nazareth finu a trent'anni,
fu bravu figghiu, dici 'u Vangelu.

Marteddi e chiova 'nta 'u to' destinu,
chianchi e lignami ognura gravusi,
tu cci piallasti, o veru mischinu,
pi ddar'a un gigghiu celi gloriusi.

Tu, fallegami, la Cruci facisti,
bravu operaiau e cuscinziusu,
cu' la fatìa lu munnu arricchisti,
onestu fusti e pacenziusu.

Eccu picchi' ti festeggiamu
ddoppu passati oramai du' millanni;

tu si' modernu e ti veneramu,
si' santu forti, famusu e granni.

La simana santa

Lu culuri viola apparatu ‘nta li chiesi
trocculi e tricchi-tracchi p’annunziari funzioni,
li campani attaccati ‘un sunavanu.
Cchiu’ chi tristizza pero’ c’era attesa.
S’infurnavano campanara e ‘adduzzi
cu’ ova tinciuti e quaresimali di mennuli.
Tappita di terri culurati
cu’ piattina di furminteddu
crisciutu gialinu sutta lu lettu,
p’addubbari li sepulcri,
lu joviri santu.
Li prerichi di la Scesa
lu venniri e la prucissioni
di Jesu mortu ‘nta la vara
e la Madonna cu’ pugnali ‘m pettu.
Capiddi rizzi e nivuri,
vistimenti e simboli pi’ luttu, di li Marii:
“L’acqua e lu pani vulemu, Signuri! boom!
Pieta’ e misericordia, Signuri! boom!”
Corpa scantusi di tammuru
ch’ a mia picciliiddu,
spustavanu lu cori.
E li cannili addummati
e l’occhi sbarrachiatu
di li fratelli ‘ncappucciati,
vistuti di biancu,
“autos da fè”, terribili.
“L’acqua e lu pani vulemu, Signuri!”
Nn’accountintavamu di picca veramenti.
E po’ la dumimica, l’Aurora,
festa di fudda, duci,
specii si primavera tincia.

lu celu d'azzurru
e li rinnini cantavanu filici.
Era Pasqua di Risurrezioni.